

Ch'abbrando sas fadigas in sa idda
 e chilco una retiru
 in su dossu 'e su monte.
 O suave Zeffiru,
 dàemi tue su primu saludu:
 friscos basos in fronte
 e profumos d'armidde!

Sos rajos de su sole manzanile
 hant bettadu in su buscu velos d'oro,
 e fattu hant de coraddu
 sos nodos de granitu;
 appèddidas e sonos de catola
 narant ch'est ischidadu ogni cuile,
 narant chi sa montagna no est sola.

In sos chercos creccàriant sas pigas
 e dae tappa in tappa
 sas mèrulas zicchirriant a bolu,
 sos palumbos in altu
 de s'aëra si pesant a istolu,
 a sas àbiles brunas
 sas roccas prus lontanas sunt amigas.

Puntanas chi bundades de continu
 da intragnas profundas,
 pulidu che ispijiu àzzis su sinu,
 cusdu a sos mundanos
 chi smant de sos pàntanos sas undas;
 dàde cunfortu a dogni pellegrinu
 chi bos fachet passende un'imbisita.

Peràccos d'eligheddas
 fechent de sentinella
 a percas e concheddas
 ch'in su tempus antigu
 hant ospitadu bandidos famosos
 e forzi hant fattu 'e zella
 a òmines eremidas
 chi fint de santidade disizzosos.

Non abbastant sas laras
 a esplicare su chi sento in coro.
 Basta chi, in dies giaras,
 bides dae sa sedda marghinina
 bellos che prendas raras
 sos pàisis ch'allevat Logudoro;
 e si sos ojos tenes che estore
 iscoberis sa riga 'e sa marina.

Donu. Viràis

Domenico Viràis

(Sassari) ANELA